

Piripos

Pawre kot Piripos kamã Jejus kôt hkwỳjê hwỳr kagà nê mênh

Pawre na pre kagàja nhípêx. Jejus nhỹ hã mẽ ahkre o mẽ pa xwỳnhjê hõ na pre. Na pre Jejus ã mẽ kãm hkurê xwỳnhjaja unê nê ma krĩ pê Rõm wỳr kumê nê kamã haxà nhũm mẽ hagdênh xà kamã hkrĩ ho hkrĩ. Tã nhũm arĩ hkrĩ rãhã Piripos kamã Jejus kôt hkwỳjê hwỳr kagàja nhípêx nê kumê. Na prem Pawre jarênh ma nê kãm ukaprĩ nê. Jakamã axpên kaxyw kàxpore hkwỳ ho akuprõ nê hwỳr kumê. Hãmri nhũm omu nê hkĩnh nê amnhĩ tã kagàja nhípêx nê kamã mẽ kãm amnhĩ jarê nê mẽ hwỳr kumê. Kot amnhĩ xà htỳx kamã hamak o hkrĩ htã arĩ hwỳr mẽ mrar xwỳnhjê mã Tĩrtũm kapêr jarênh rãhã ho hkrĩ hã amnhĩ jarê. Nê kãm Jejus kot amnhĩ nhípêx kôt pix mã amnhĩ nhípêx o pa hprãm ã amnhĩ jarê. Nê kãm Jejus jamaxpêr kôt pix mã hamaxpêr prãm ã amnhĩ jarê. ã na pre Pawre kagàja kamã mẽ kãm amnhĩ jarênh anê. Nê mẽ kãm:

1 1Pa Piripos kamã Jejus Kris kôt ixkwỳjaja. Xà mẽ amex na ka mẽ apa? E ixpê Pawre na pa mẽ amã kagàja nhípêx nê kamã mẽ amã amnhĩ jarê nê mẽ awỳr kumê. Nhũm Ximotre haxwỳja kãm ja mex nê. Wa ixpê Jejus mã tanhmã amnhĩ nhípêx to ho wa ixpa xwỳnh jakamã na pa wa mẽ awỳr hipêx nê kumê. Mẽ ate Tĩrtũm kapêr o mẽ ajahkre xwỳnhjê hwỳr nê mẽ kãm mẽ ate tanhmã amnhĩ to xwỳnhjê hwỳr nê mẽ ate mẽ mar o akrĩ xwỳnhjê hwỳr. Mẽ apê Kris kôt wa ixtõ nê wa ixtõxjê ho ixpimràatã mẽ awỳr hipêx nê kumê. 2E kê Mẽpanhĩpêxà maati Tĩrtũm mẽ Pahihti Jejus Kris wa mẽmoj to mẽ akutã nojarêr rãhã nê ka mẽ axàmnhĩx ri ajamakêtkati nê ri apa ho apa.

Pawre kot Piripos nhõ xwỳnhjê ho Tĩrtũm wỳr ã harênh

Epes 1.15-19; Korosê 1.9-12

3Na pa hte xatã mẽ amã ijamaxpêr o ixkrĩ nê mẽ panhõ Tĩrtũm kot tanhmã mẽ ato mex toja pa kãm ijamaxpêr nê ixkĩnh nê ixkrĩ. 4Nê Tĩrtũm mã mẽ ajarênh nê mẽ ato kuwỳ. Ixkĩnh kãm mẽ ato kuwỳ.

5Wam ixte mẽ awÿr inhmõrta ã na pa pre mẽ amã Jejus kot mẽ panê tanhmã amnhĩ nhĩpêx to hã harênh o ri mẽ akõt ixpa. Ka prem inhma nê hkõt amnhĩ xunhwÿr tÿx nê hkõt amnhĩ nhĩpêx o ri apa. Jakamã inhmã axpên kaxyw ri kàxpore hkwÿ nhõr o apa. Te ham mẽ ate ixwÿr mênhta pyræk pa pre mẽ akukwak ri amnhĩm ho ixujaprõr o ri ixpa pê nhãm ri mẽ kãm Jejus jarênh o ri mẽ hkõt ixpa. Na pa hte arĩ jam ijamaxpêr rãhã ho ixkĩnh nê ixkrĩ. Nê Tĩrtũm mã mẽ ate ixto mex ã kãm mẽ ajarênh o ixkrĩ.

6Nê na pa pre ma mẽ awÿr mõi nê mẽ amã Jejus jarê ka prem inhma nê hkõt amnhĩ xunhwÿr nhũm Tĩrtũm ja hã mẽ apumunh mex nê. Hãmri nê mẽ ate hkõt amnhĩ to htÿx kaxyw tanhmã mẽ ato mẽ axihtÿx to. Tã koja arĩ mẽ ato mẽ axihtÿx rãhã nhũm Jejus Kris nhÿrmã akupÿn mẽ pahwÿr wrÿ. Koja ã mẽ ato mex anê. 7Na hte tanhmã ixto mex tota pyrã nê tanhmã mẽ ato mex to ho pa nê mẽ akutã nojarêr rãhã ho pa.

Nê kormã mẽ kot ijaxàr kêt ri pa pre ma mẽ piitã mẽ kãm Jejus jarênh o ri ixpa. Nê ãm hãmri mẽ kãm harê. Mẽ kot mar nê hkõt amnhĩ xunhwÿr tÿx kaxyw pa pre mẽ hkõt harênh rãhã ho ri ixpa. Ka prem ja kaxyw inhmã kàxpore hkwÿ gõi pa pre ho amnhĩm ixujaprõr pê mẽ hkõt ri mẽ kãm harênh o ri ixpa. Tã nhũm prem jar Rõm kamã ijaxà pa arĩ ixkrĩ htã ka mẽ axte ixwÿr hkwÿ mẽ. Jakamã na pa hte mẽ amã ijamaxpêr rãhã ho ixkrĩ nê inhmã mẽ akĩnh tÿx nê. 8Te Jejus Kris kãm mẽ ajapê htÿx pyræk. Tĩrtũm kot ja hã xpumunh mex.

9-10Na pa hte mẽ ato kuwÿ nê kãm:

— Pa Tĩrtũm. E Piripos nhõ xwÿnhjê pumu. Na mẽ ra kãm axpên kĩnh o axpên kõt pa. Kwa tanhmã mẽ hipêx to kê mẽ arĩ kãm axpên kĩnh tÿx pix nê. Jao axpên to mex rãhã ho pa. Nê tanhmã mẽ hkrã hto kê mẽ amnhĩ krãm akapêr jaxàr tÿx nê. Jao tãm amnhĩ nhĩpêx mex nê hamaxpêr mex o ri pa. Nom kormã mẽ kot ja pumunh tohtuj anhÿr. Tã kêr ka tanhmã mẽ ho kê mẽ ã amnhĩ nhĩpêx anhÿr rãhã Jejus Kris akupÿn mẽ ixwÿr wrÿ.

Anhÿr pa hte mẽ ato hwÿr o ixpa. 11Nã koja Jejus Kris mẽ akaxwÿnh kãm mẽ ato mẽ axihtÿx ka mẽ ÿ hã axihtÿx pê tãm ri amnhĩ nhĩpêx nê tãm axpên nhĩpêx o ri axpên kõt apa. Nhũm mẽ piitã ja hã mẽ apumu nê axpên mã Tĩrtũm mex o mex ã harê.

Pawre kãm Kris kõt amnhĩ nhĩpêx prãm ã harênh

Atre 28.30-31; Epes 6.19-20; Sikũn Ximotre 2.9

12E Kris kõt ixtõ nê ixtõxjaja. Kot paj mẽ amã tanhmã amnhĩ jarênh to ka mẽ inhma. Na prem ra Jejus ã ixtomnuj tÿx nê hã ijaxà pa amnhĩ xà htÿx kamã ijamak o ixkrĩ. Nom mẽ kot ã inhĩpêx anhÿr tã pa hte arĩ ixkrĩ xà kamã mẽ kãm Jejus jarênh o ixkrĩ. Jakamã na mẽ ra ohtõ nê tanhmã kot mẽ panê amnhĩ nhĩpêx to hã harênh ma. 13Põristi kot

inhĩhkô hã ixtãnopxar xwỳnhjê mẽ ixwỳr mẽ mrar xwỳnh piitã ixte Kris kapêr jahkre ho ixpa pix ã mẽ kot ijaxàr ã ijarênh ma. 14Nê jar Kris kôt mẽ pahtô nê mẽ pahtôxjaja haxwỳja ijarênh ma nê ohtô nê ixpyrà nê Kris nhỹ hã amnhĩ to htỳx nê arĩ hkwỳjê mã kapêr jarênh rãhã ho pa. Ixpyrà nê kãm mẽ uma hkêt nê mẽ kutã amnhĩ to htỳx pê mẽ kãm harênh rãhã ho pa.

15-18Nê na pre mẽ hkwỳjaja ixte mẽ amã Kris jarênh o ixpa hã ijarênh ma nê hã ixkamã gryk nê axtem hamaxpêr nê ixwakre kamã gryk kãm mẽ kãm Kris kapêr jarênh o pa. Na htem hamaxpêr o:

— E kot paj ma Pawre kot ra mẽ hwỳr môr xwỳnhjê hwỳr mỗ nê kot ra mẽ kãm Jesus kapêr jarênh nhĩpy axte mẽ kãm harênh o ri mẽ hkôt ixpa. Hãmri nhũm mẽ inhma nê inhgryk ã Pawre kaga. Hãmri nhũm mẽ hagjênh xà kamã arĩ hkrĩ tã tee ri mẽ hã ijarênh ma nê hkaprĩ nê rĩ amnhĩ pumu. Nà kot paj anê.

Anhỹr o hamaxpêr tã pa mẽ harênh ma nê ixkaprĩ hkêt nê. Mẽ kot mẽ amã hprĩ hã Kris kapêr jarênh kênã kot pa kêt tee ri mẽ harênh ma nê ixkaprĩ. Kwãr mẽ mãmri ri ixkamã gryk kãm kapêr jarênh o ri pa. Pa mẽ harênh ma nê ixkĩnh nê. Nom na hte mẽ hkwỳjaja jajê rom kãm ixkĩnh kãm mẽ kãm Kris kapêr jarênh o pa. Nê tãm hamaxpêr pê mẽ kãm harênh o pa. Ra mẽ kot ixpumunh mex jakamã nhũm Tĩrtũm kot jar mẽ hwỳr inhmênh nhũm ixte ãm hãmri mẽ kãm kapêr mex jarênh o ri ixkrĩ hã ixpumunh mex. Jakamã kwãr mẽ mãmri tanhmã inhmã hamaxpêr to xà hkôt mẽ ujarênh mexja jarênh o pa. Mẽ kãm ixkĩnh kãm harê rỹ ixkamã gryk kãm ri harênh o pa. ãm hãmri Kris kapêr jarênh o pa jakamã pa mẽ harênh ma nê ixkĩnh nê.

19Nê ra mẽ ate ixto Tĩrtũm wỳr o apa jakamã koja Karõja ixkaxyw tanhmã jar Rõm kamã pahihti nhĩpêx to nhũm tokyx ixkator japêr. Pa ixãmnhĩx ijamakêtkati nê ri ma mẽ akôt ixpa. 20Nom inhmã Jesus kãm hprãm xà hkôt pix mã tanhmã amnhĩ nhĩpêx to ho ixpa hprãm. Jakamã koja mẽ ixkator pa ixkĩnh nê arĩ kãm tanhmã amnhĩ nhĩpêx to ho ri ixpa. Nom koja mẽ tanhmã hamaxpêr to nê ixpĩ pa mẽ kutã mẽ kãm amnhĩ to htỳx nê ixãm rãhã nhũm mẽ ixpĩ pa ijamakêtkati nê ty. Kê mẽ ja hã ixpumu nê ixtã Kris mex o mex ã harê. ãm Jesus kãm hprãm xà hkôt pix mã na inhmã amnhĩ nhĩpêx prãm. 21Tã kot paj tanhmã amnhĩ to nê arĩ ixtĩr japêr hã kot paj ãm kôt pix mã amnhĩ nhĩpêx rãhã ho ixpa. Nom koja mẽ tanhmã hamaxpêr to nê hã ixpĩ pa ty nhũm Tĩrtũm ma kaxkwa hwỳr ixkarõ ho àpir kurê kumrêx. Pa Tĩrtũm mẽ Krata wa kuri inhmex o inhmex nê wa kuri ixpa ho ixpa. 22-23Tã nhỹ na we inhmã mex o hõ jakrenh wehe? Na pa tee ri amnhĩ kukamã ijamaxpêr. Inhmã tokyx ixtyk nê Kris kuri ixpa hprãm. Ja na inhmã hprãm o inhmã hprãm. Nom ko. Kot pa arĩ ixtĩr nê arĩ mẽ kãm Jesus kot tanhmã mẽ panê amnhĩ nhĩpêx to hã harênh rãhã ho ri ixpa. Ko. Ja mããnên inhmã mex. 24No mẽ amã

na arĩ ixtĩr nẽ ixpaja mẽ amã hprãm 25jakamã kot paj pẽr tokyx ixtyk kêt nẽ. Kot paj arĩ ri mẽ amã Kris kôt mẽ ato mẽ axihtỳx o ri mẽ akôt xpa. Jao ãm ho hkrãnre ka mẽ ra amnhĩ kaxyw kãm ajamaxpẽr nẽ hkôt amnhĩ xunhwỳr tỳx nẽ. Jao akĩnh nẽ apa. 26Tã kot paj nhỹrmã akupỳm ixtĩr rãhã mẽ awỳr mỗ ka mẽ ixpumu nẽ akĩnh nẽ. Jejus Kris kot akupỳm ixkator ã akĩnh nẽ. Hãmri nẽ ixtã Jejus mã mex o mex ã harẽ.

Mẽ pahte Jejus ã pahpunuj tã mẽ pahte amnhĩ to htỳx ã mẽ pamã karõ

Rukre 6.22; Sikũn Korĩt 2.14-16; Xiakre 1.12; Jutre 3

27Jakamã e kêt ka mẽ Jejus Kris kapẽr kôt pix mã amnhĩ nhĩpêx. Nẽ axpẽn kôt axpẽn to axihtỳx pẽ mẽ kãm Jejus kot tanhmã mẽ panê amnhĩ nhĩpêx to hã harẽnh o ri apa kê mẽ ama nẽ mẽ pahpyrà nẽ hkôt amnhĩ xunhwỳ. E kêt ka mẽ ã amnhĩ nhĩpêx anhỹr o ri apa. Kêt pa nhỹrmã mẽ hagjênh xàja rũm ixkator japêr nẽ nhỹri ja hã mẽ ajarênh ma rỳ ma mẽ anhõ krĩ hwỳr mỗ nẽ ja hã mẽ apumu nẽ ixkĩnh nẽ. 28Nom kwa kêt ka mẽ amã mẽ kot Kris ã tanhmã mẽ ato xwỳnhjê puma hkêt nẽ. Mẽ kot tanhmã mẽ anhĩpêx kati hto htã kêt ka mẽ kutã amnhĩ to htỳx nẽ mẽ hkôt apa. Kêt kê mẽ amnhĩ tã mẽ apumu nẽ tee ri hamaxpẽr hãmri nẽ axpẽn mã:

—Kwa mẽ pahte Kris ã tanhmã mẽ hipêx to htã na htem amnhĩ to htỳx nẽ arĩ mẽ pamã harẽnh o ri pa. Pẽr mẽ kãm mẽ pahpuma hkêt. Mãn hte Tĩrtũm tanhmã mẽ ho nhũm mẽ ỹ hã kãm mẽ pahpuma hkêt nà? Kwa tanhmã kot puj mẽ ho nhũm mẽ Jejus kapẽr jarênh o pata kaga? Nà kot puj mẽ ãm tee ri hã tanhmã mẽ ho kaprỳ. Mãn ãm hãmri na htem nhỹrmã Tĩrtũm kuri htĩr tũm nẽ pa ho pa hã amnhĩ jarênh o pa nà? Anẽ.

Koja mẽ ã mẽ ajarênh anẽ. Tĩrtũm kot mẽ ato mẽ axihtỳx ã mẽ apumunh kôt. 29Na pre tanhmã mẽ ato ka mẽ Kris kôt amnhĩ xunhwỳ. Tã mẽ kot tanhmã hã mẽ anhĩpêx to htã na hte Tĩrtũm mẽ kutã tanhmã mẽ ato ka mẽ ỹ hã amnhĩ to htỳx nẽ apa. 30Ijaxwỳja na pa hte amnhĩ xà htỳx kamã ijamak o ixkrĩ. Na pre htem Jejus ã ixtomnuj o pa ka prem ja hã ijarênh ma nẽ hã ixpumu. Tã ota kê mẽ ra axte tanhmã hã inhĩpêx to. Pa kê amnhĩ xà htỳx kãm ijamak o ixkrĩ ka mẽ ijarênh ma. Tã xep mẽ ixpyrà nẽ Kris ã amnhĩ xà htỳx kamã ajamak o apa. Nom kwa kêt ka mẽ tee ri amnhĩ kukamã ajamaxpẽr o akaprĩ nẽ apa hkêt nẽ.

Jejus kãm mẽ pajapê xaj tanhmã kot amnhĩ nhĩpêx to hã harẽnh

Rõmãn 15.5-6; Epes 4.1-6; Piripos 2.18

2 1Nẽ ra mẽ pahte Jejus kôt amnhĩ xunhwỳr jakamã pu mẽ tee ri amnhĩ kukamã pajamaxpẽr o pahkaprĩ nẽ ri papa hkêt nẽ. ãm kãm mẽ pajapêja mã pajamaxpẽr rãhã ho pahkĩnh nẽ pajamakêtkati nẽ ri papa. Nhũm Karõ mẽ pahkarõ mã agjê nẽ mẽ pahto mex nẽ mẽmoj to mẽ pakutã nojarêr o ri mẽ pakamã pa. 2Tã kêt ka mẽ axpẽn mar mex nẽ

měmoj tã axpën mã axàkjêr o ri apa hkêt nê. Te ri ixkre pixi kamã mẽ atipxi nê axpën kôt amnhĩ nhĩpêx pyræk. Nê Tĩrtũm kãm hprãm xà hkôt pix mã ajamaxpêr o ri apa. Nê mẽ amã axpën kĩnh o ri apa. Kot kaj mẽ ã amnhĩ nhĩpêx anê pa ja hã mẽ apumu rỳ hã mẽ ajarênh ma nê ixkĩnh tỳx kumrêx.

3Nê kwa kêr ka mẽ axpën pumu nê ã ajamaxpêr anhỹr kêt nê. Mẽ ajamaxpêr o:

—Tk. Kot pa ri tanhmã jahti ho ajuta hto ho ixpa hkêt nê. Ixte amnhĩ to rax o hakrenh kênã kot pa hkêt ri ho ajuta. Kê tãm mãn tanhmã ixto ajuta hto.

Anhỹr o ajamaxpêr kêt nê. Kêt nhỹri mẽhõ pumu nhũm tanhmã kute ka hã omu nê ajamaxpêr o:

—Hêxta waa nê. Kwa tanhmã kot pa we ho ajuta htoo?

Anhỹr o ajamaxpêr hãmri nê ajamaxpêr xà hkôt tanhmã ho ajuta hto.

4Jao Jejus pyrà nê mẽmoj to axpën kutã anojarêt o ri apa. No ri amnhĩ pix kukamã ajamaxpêr o apa hkêt nê. 5Kêr pu mẽ te Jejus tanhmã hamaxpêr toja pyræk o pajamaxpêr o ri papa.

6 Kêp Tĩrtũm Kra kumrêx jakamã te uræk tã xà na pre ja hã amnhĩ pumu nê amnhĩ pix kukamã ã hamaxpêr anê nê hamaxpêr o:

Te ixte Tĩrtũm pyræk jakamã mẽmoj piitã inhõ na. Jakamã kot paj jar kaxkwa kamã inhmex nê ixkĩnh nê ixpa ho ixpa nê aa rer nê nhỹhỹm inhmõr kêt kumrêx. Anhỹr o na pre hamaxpêr? Nà na pre ã hamaxpêr anhỹr kêt nê.

7-8 Kãm mẽ pajapê xàj na pre kaxkwa kamã mẽmoj mex piitã rer pa nê man mẽ pahwỳr wrỳ nê mẽ pahpyrà nê ĩ ho katorxã nhõhy rũm kato.

Kêp mẽ panhõ Pahihti htã te kêp mẽ panhĩõ nê te kot amnhĩ to grire pyræk o amnhĩ nhĩpêx o ri pa.

Nê Tĩrtũm kãm hprãm xà hkôt pix mã amnhĩ nhĩpêx o pa. Nê ãm kôt pix mã amnhĩ nhĩpêx o pa rãhã nhũm prem kupĩ nhũm arĩ mẽ kãm xa nê tanhmã amnhĩ tã mẽhõ hto hkêt nê.

Na prem hipêx kati nê. Te kêp mẽ kot amnhĩ tomnuj tỳx xwỳnhjê nhĩpêx pyræk o hipêx nê pĩ kahpa hã kunhõ nê kupĩ.

Tã no nhũm mẽ kêp tanhmã amnhĩmnuj to hkêt nê arĩ mẽ kãm xa. Mẽ panê na pre ã amnhĩ nhĩpêx anê.

9 Hãmri nhũm Tĩrtũm ã kot amnhĩ nhĩpêx anhỹr ã omu nê akupỹm ho htĩr nê akupỹm amnhĩ wỳr ho api.



Piripos 2.3-4

Ně mex o mex ã harě.

Ně kot nhỹrmã mẽ pahpiitã mẽ pahto amnhĩptãr kaxyw mẽ pakaxyw ãm.

10 Jakamã kot puj mẽ nhỹrmã pahpiitã Jejus kutã pahkõnkrã ho rôrõk nẽ pahkrĩ hpa nẽ kàx pêê kãm mex o mex ã harě.

Mẽ pahpiitãã. Kaxkwa kamã mẽ pa xwỳnhjaja nẽ pika piitã hkõt mẽ papa xwỳnhjaja.

Ně mẽ htyk xwỳnh piitã koja mẽ akupỹn htĩr pu mẽ pahpimràatã Jejus kutã pahkõnkrã ho parôrõk nẽ pahkrĩ hpa nẽ kãm mex o mex ã harě.

11 Nẽ kãm:

Pa Pahihti Jejus. Nà ãm hãmri na apê mẽ inhõ Pahi Maati hã apyxi mex na ka.

Jakamã mẽ ixtõ kot paj mẽmoj tã tanhmã amã karõ hto? Nà kot paj mẽ ixtõ ã amnhĩ nhĩpêx anhỹr kêt nẽ. Anẽ.

Kot puj mẽ nhỹrmã ã Jejus mã pakapěr anẽ.

Jao mããnẽn Tĩrtũm hihtỳx o hihtỳx nẽ àhpumunh o àhpumunh ã omu. Nẽ mex o mex ã omu.

Te mẽ pahpê kanhêti pyrãk ã mẽ pajarẽnh

Matêwre 5.14-16

12-13Tã kwa ixkrãmnhwỳjaja. Inhmã mẽ akĩnh. Kwa kêr ka mẽ arĩ Tĩrtũm kõt amnhĩ nhĩpêx mex rãhã nẽ. Te ixte mẽ akamã ixpare ri mẽ ate amnhĩ nhĩpêx mexta pyrãk o ixwakre kamã amnhĩ nhĩpêx mex o ri apa. Na pre ra Tĩrtũm mẽ panê mẽ pahte amnhĩ tomnuj rê nẽ tanhmã mẽ pahto pu mẽ ã hã kapěr kõt amnhĩ nhĩpêx o ri papa. Jakamã kwa kêr pu mẽ axte tanhmã amnhĩ tomnuj to ho papa hkêt nẽ. Nẽ mẽ pahte Tĩrtũm kapěr kwỳm ri amnhĩ nhĩpêx pymaj ãm hkõt pix mã amnhĩ nhĩpêx o ri papa.

14Nẽ kêr ka mẽ mẽmoj to anhỹr kaxyw nẽ agryk kãm tanhmã ri ho hkêt nẽ. Nẽ mẽmoj tã axapênh kaxyw nẽ ri hã axpên mã akapěr kati kamã ho anhỹr kêt nẽ. 15-16Mẽ kot amnhĩ tomnuj xwỳnhjaja na htem ã amnhĩ nhĩpêx anhỹr o pa. No kêt mẽ kajaja. Mẽ ate mẽ hkõt apa htã kêr ka mẽ hkõt amnhĩ nhĩpêx kêt nẽ. Mẽ kurom mẽ apê Tĩrtũm kra jakamã kêr ka mẽ hkõt pix mã amnhĩ nhĩpêx o ri apa. Nẽ tanhmã amnhĩ tomnuj to rỹ tanhmã ajamxpěr punuj to hkêt nẽ. Mẽ kot amnhĩ tomnuj xwỳnhjaja te ri kamãt kô kamã ri mẽ kêp àhkĩnh o ri mẽ pa xwỳnhjê kot amnhĩ nhĩpêx pyrãk. Tã kot kaj mẽ hkõt tãm ri amnhĩ nhĩpêx o apa nẽ te ate kanhêtiija kamãt kô kamã hirã ho harir pyrãk o amnhĩ nhĩpêx. Jao mẽ kãm Tĩrtũm kapěr jarẽnh o ri mẽ hkõt apa. Mẽ kot amar nẽ apyrã nẽ nhỹrmã kuri htĩr tũm nẽ pa ho pa kaxyw. Kot kaj mẽ ã amnhĩ nhĩpêx anẽ nhũm nhỹrmã Jejus Kris akupỹn mẽ pahwỳr wrỳk ã arĩgrota ã pa

mě apumu ně ixkính ně. Ně ixkính kām Jejus mā mẽ ajarẽ ně kām mẽ ajarẽnh o:

—Kwa Pahihti. E jajê pumu. Na pa pre mẽ kām akapêr jarẽnh o ri mẽ hkôt ixpa nhũm mẽ inhmar tỳx ně mẽ akapêr kôt amnhĩ nhĩpêx o ri pa. Jakamã na pa pre mẽ kām akapêr jarẽnh kaprỳ hkêt ně.

Anhỹr o kām mẽ ajarẽ. 17Na pa pre mẽ akôt mẽ amã Tĩrtũm kapêr jarẽnh o ri ixpa ka prem inhma ně hkôt amnhĩ xunhwỳ. Jakamã te ixte Tĩrtũm mā mẽ ato ixkính xà ně kām mẽ anhõr pyræk.

Ně koja jar Rõm nhõ pahihtija tanhmã ixto hkêt japêr. Rỳ tanhmã ixto. Nom kwār mẽ māmri tanhmã kām ixto hprãm xà hkôt tanhmã ixto rỳ xipĩ. Koja mẽ ã ixte mẽ anhĩpêx anhỹr ã xipĩ pa ixkính ně. Ně tanhmã ijamaxpêr to hkêt kām ty. Jakamã na pa ra ã mẽ kot inhĩpêx anhỹrja kukamã mẽ amã amnhĩ kính ã amnhĩ jarẽ ka mẽ inhma. 18Tã kêt ka mẽ ixpyrà ně ajaxwỳja ixtã akính ně apa.

Ximotre mẽ Eparoxit wa harẽnh

19Ně koja Pahihti Jejus kām ja prãm hã kot paj ma mẽ awỳr Ximotre mẽ nhũm ma mẽ awỳr mō ně ri mẽ akôt pa ně tanhmã mẽ ate amnhĩ nhĩpêx to hã mẽ apumu. Hãmri ně man akupỹn ixwỳr mō ně inhmã mẽ ajarẽ pa mẽ ajarẽnh ma ně ixkính ně tee ri mẽ akukamã ijamaxpêr o ixkrĩ hkêt ně. Ām tãm mẽ akukamã ijamaxpêr o ixkrĩ. 20Ximotre tapxipix na ixpyrà ně kām mẽ akính ně kām mẽ ato ajuta hprãm. Na hte mẽ ajarẽnh rãhã ho pa. 21Nom jar mẽ piitã Ximotre kínhã amnhĩ mex pix kukamã hamaxpêr o pa ně kām Jejus Kris kôt tanhmã amnhĩ nhĩpêx to ho pa hprãm kêt ně.

22Ximotre te kêp ixkra pyræk. Na hte ixkôt pa ně ixpyrà ně Jejus mā tanhmã amnhĩ nhĩpêx mex to ho pa. Pa pre wa ijamẽ mẽ kām mẽ ujarẽnh mex jarẽnh o wa ri mẽ hkôt ixpa. 23Tã koja mẽ tanhmã ixtã axpẽn mar to. Apu mẽ kot ixpĩr ã amnhĩ jarẽ rỳ ixkator ã amnhĩ jarẽ. Pa tanhmã amnhĩ tã mẽ mar to ně rĩ kormã ma mẽ awỳr Ximotre mẽ kê ma mẽ awỳr mō ně mẽ amã tanhmã ijarẽnh to.

24Ně koja Pahihti Jejus kām ja mex pa ijaxwỳja ma mẽ awỳr mō pu mẽ axte axpẽn pumu.

25Ně kot paj tokyx ma akupỹm mẽ awỳr Kris kôt mẽ pahtõ Eparoxit mẽ. Na ka prem kām kàxpore gõ nhũm man ixwỳr o mō ně inhmã kugõ. Hãmri ně jar inhmã àpênh rax ně ixpyrà ně mẽ ujarẽnh mexja jarẽnh o pa. 26-27Tã ra à htỳx ně. Kironhỹx pre mẽ pahpê ty. Tã nhũm Tĩrtũm omu ně kamã ukapĩrĩ ně. Ně määnẽn pa ixkamã ukapĩrĩ ně. Ně tee ri ixte à htỳx ã omunh ně ixkapĩrĩ htỳx pymaj akupỹm inhmã ho mex nhũm ra akupỹm mex ně ri pa. Hãmri ně kām mẽ apumunh prãm ně. Mẽ ate à htỳx ã harẽnh mar ně akapĩrĩ hã mẽ ajarẽnh ma ně tee ri mẽ akukamã hamaxpêr. 28Jakamã inhmã akupỹm tokyx mẽ awỳr

mēnh prām. Tã koja mēmo arĩgro hã mē awÿr pøj ka mē omu nē akĩnh nē tãm ajamxpēr. Pa ijaxwÿja jar ixkĩnh nē tãm ijamxpēr. 29-30 Na ka prem ixwÿr amē nhũm man ixwÿr mō nē jar ixri mē kãm Kris kapēr jarēnh o ri mē hkõt pa rãhã nhÿx hã ty nom kot amnhĩ kamã kahak kêt. Jakamã kê akupÿm mē awÿr pøj ka mē omu nē akĩnh nē. Nē kahti hkõt amÿ nē ho mex nē. Kêp Kris kôt mē pahtō mex kēnã. ã na htem Kris mã mē kot tanhmã amnhĩ nhĩpêx to ho mē pa xwÿnhjê nhĩpêx mex anhÿr o pa.

**Mēmoj tã mē pahpumunh kôt Tĩrtũm kot tãm mē
paxunhwÿr ã harēnh**

Piripos 2.18, 4.4

3 1E Kris kôt ixtō nē ixtōxjaja. Kris kêp mē panhō Pahihiti jakamã kwa mē jam ajamxpēr nē akĩnh rãhã ho ri apa.

Na pa ra mē amã mēmoj jarēnh rax nē. Nē hã kagà rax tã kormã inhmã ja ho anhÿr kaga hkêt nē. Kot paj axte mē amã hkwy hã kagà. Mē ate hã ano htÿx nē ho apa kaxyw. 2Jakamã e kwa mē okora. Kêr ka mē amnhĩ nē mē kot Tĩrtũm kapēr o hêx xwÿnhjê pumunh mex o ri apa. Na htem tanhmã mē amã kapēr ho pa nē mē amã:

—Kot kaj mē ixpê Ijaewjê pyrà nē amnhĩ my kwrÿt kà jakà hãmri nē apê Tĩrtũm kra. Anē.

3Nom ja kot anhÿr kêt. Mē pahte amnhĩ jakàr kôt mē pahpê Tĩrtũm kra hkêt. ã kot anhÿr ronhÿx pu mē amnhĩ krã hkõt tanhmã amnhĩ nhĩpêx to ho pahpê hkra. Nom ja kot anhÿr kêt. Mē ate amnhĩ jakàr kêt tã mē ixpyrà nē amnhĩ kaxyw Jejus Kris mã ajamxpēr jakamã mē ixpyrà nē mē apê Tĩrtũm kra na ka mē. Na ka htem mē ixpyrà nē Karō nhÿ hã kãm mex o mex ã harēnh o ri apa nē mē ixpyrà nē Jejus kukwak ri akĩnh nē ri apa. Nom na pu htem pahpê hkra kaxyw amnhĩ jakàr kêt nē. 4Kop ãm amnhĩ krã hkõt mē pahte amnhĩ to Tĩrtũm kra ronhÿx pa ra amnepêm amnhĩ to hkra nē ri ixpa. Na pa pre ixpê hkra hprãm xaj amnhĩ krã hkõt tanhmã ri amnhĩ nhĩpêx to rax o ixpa nom ã amnhĩ nhĩpêx anhÿr kaprÿ. E pa ja hã mē amã amnhĩ jarē ka mē ijarēnh ma.

5Na pa pre ixkato nē kormã ixtã semãn pixire nhũm mē ixpê Ijaew ã inhmy kwrÿt kà krãhta. Nom pa ã mē kot inhĩpêx anhÿr kôt ixpê Tĩrtũm kra hkêt nē. Nē inhĩpêxã hkõt ixpê finat Pějãmĩ kanrēhã htãmnhwÿ jakamã ixpê Ijaew mex na pa. Nē Ijaew kapēr o ixkapēr o ri ixpa. Nom ja kôt ixpê Tĩrtũm kra hkêt. Nē mãänēn ixpê Parijew nhō xwÿnh jakamã na pa pre Tĩrtũm kot finat Mojes mã mē pakaxyw mēmoj tã karō kôt pix mã amnhĩ nhĩpêx o ixpa hprãm. 6Jao tee ri mē kot Jejus kôt amnhĩ nhĩpêx xwÿnhjê pumu nē mē homnuj tÿx o ri ixpa. Na pa pre ijamxpēr o: “Nã mÿjjaja na htem mē ixkwÿm ri amnhĩ nhĩpêx o pa.” Anē nē mē hipêx kati ho ri ixpa. Nē ijamxpēr o: “Ra ixte finat Mojes kot Tĩrtũm

nhỹ hã kapēr piitã hkôt amnhĩ nhĩpêx mex jakamã na pa hte tanhmã ri amnhĩ tomnuj to ho ri ixpa hkêt nê.” Anê.

7^Å na pa pre ixpê Tĩrtũm kra hprãm xaj amnhĩ nhĩpêx anhỹr o ixpa. Tã nom ãm ã amnhĩ nhĩpêx anhỹr hkaprỹ. Na htem ã ri amnhĩ nhĩpêx anhỹr kôt kêp Tĩrtũm kra hkêt nê. Tã pa hpãnhã amnhĩ kaxyw Kris kôt ijamaxpêr nhũm ixto hkra kurê kumrêx.

8^{Ra} ixte Jejus Kris kôt amnhĩ xãm jakamã Jejus kêp inhõ Pahihti pa inhmã kapêr kôt pix mã amnhĩ nhĩpêx o ri prãm. No hkrax rũm ixte amnhĩ nhĩpêx tũmja na pa ra Jejus gryk ã hkaga hpa. Te ixte mêmõj punuj pyr nê amnhĩ katut kôt mênh nê axte kãm ijamaxpêr kêt pyræk. Jao amnhĩ kaxyw Jejus kôt pix mã ijamaxpêr o ri ixpa. 9^{Nom} kormã ã ijamaxpêr anhỹr kêt ri na pa pre ixtỹx ri ijamaxpêr o:

—Nà ixte Mojes kot Tĩrtũm nhỹ hã kapêr kôt amnhĩ nhĩpêx o ixpa jakamã koja Tĩrtũm ja hã ixpumu nê ixto hkra.

Anhỹr tã nom ja kot anhỹr kêt. Na htem amnhĩ krã hkôt tanhmã ri amnhĩ nhĩpêx to ho pa nhũm Tĩrtũm ãm ja hã mẽ omu nê ãm hã mẽ omu nê mẽ ho hkra hkêt nê. Nom koja mẽ Kris kôt amnhĩ xunhwỹ nhũm ja hã mẽ omu nê mẽ ho hkra kurê kumrêx. Jakamã ixte Kris kôt amnhĩ xãm ã ixpumunh kôt pix mã na pre ixto hkra nê inhmex ã ijarê. 10^{Hãmri} pa ra inhmã Kris kôt pix mã amnhĩ nhĩpêx o ri ixpa hprãm. Na pre ty tã akupỹm htĩr nê hihtỹx nê àhpumunh tỹx o tanhmã amnhĩ nhĩpêx to ho pa. Tã ijaxwỹja inhmã urãn ã amnhĩ nhĩpêx anhỹr prãm. Nê inhmã uræk nê amnhĩ xà htỹx kutã amnhĩ to htỹx nê ixpa hprãm. Mẽ kot hã ixpĩr mã tã pa uræk nê Tĩrtũm kapêr kaga hkêt nê ãm kôt pix mã amnhĩ nhĩpêx o ri ixpa rãhã uræk nê hã ty. Ja na inhmã ho anhỹr prãm. 11^{Kê} Tĩrtũm kot hipêxta pyrã nê akupỹm ixto ixtĩr pa wa kuri ixtĩr tũm nê ixpa ho ixpa. 12^{Inhmã} Kris kôt pix mã amnhĩ nhĩpêx o ixpa hprãm tỹx kumrêx. Kormã ixte hkôt amnhĩ nhĩpêx o inhmõr nê kormã hatur xãm mênh kêt tã inhmã tokyx hatur xãm mênh prãm. Na pa ã inhmã amnhĩ nhĩpêx anhỹr prãm tỹx kumrêx.

Nê na pa hte ixte amnhĩ tomnuj kêt ã amnhĩ to jarkrar o ri ixpa hkêt nê. Na pa hte arĩ tõhã tanhmã amnhĩ tomnuj to nom inhmã ã amnhĩ nhĩpêx anhỹr prãm kêt. Nê na pa kormã ixprĩ hã Kris kot amnhĩ nhĩpêx mar o inhmõr nê hatur xãm mênh kêt tã inhmã hkôt amnhĩ nhĩpêx o inhmõr nê tokyx hatur xãm mênh prãm. Ja kaxyw na pre Jejus Kris amnhĩ kaxyw ixta. 13^{Na} pa hte mẽ akurom papxipix ixte Jejus kãm hprãm xà hkôt amnhĩ nhĩpêx o ixpa hã amnhĩ to jarkrar kêt nê. Nom ra ixte tanhmã amnhĩ tomnuj to ho ixpata pa axte kãm ijamaxpêr kêt nê. Te amnhĩ katut kôt ixte rênh par pyræk o hipêx nê axte kãm ijamaxpêr kêt nê. Nê Jejus kãm hprãm xà hkôt pix mã amnhĩ nhĩpêx prãm xaj amnhĩ kaxyw kãm ijamaxpêr o ri ixpa.

14^{Koja} nhỹrmã Tĩrtũm ixpê Kris kwỹ hã amnhĩ wỹr ixwỹ nê inhmã:

—E amnẽ ixwÿr api Pawre. Kot kaj jarãhã amnẽ mẽ ixwÿr api.

Anhÿr o nhÿrmã inhmã kapẽr jakamã na pa hte amnhĩ tã ãm pix jamãr rãhã ho ixpa. Pẽ ra Jejus kot amnhĩ nhĩpẽx piitã omunh par o mõi. Nà kot paj gaa nẽ hkõt pix mã amnhĩ nhĩpẽx mex o ri ixpa. 15Kwa kêr pu mẽ pahpiitã ã pajamaxpẽr anẽ. Jao amnhĩ wÿr hamãr pẽ hkõt pix mã amnhĩ nhĩpẽx o ri papa. Mẽ pahpiitã mẽ pahpẽ Kris kwÿ kẽnã. Nom kot ka mẽ atõ ja kaxyw tee ri amnhĩ kukamã ajamaxpẽr nẽ ajamaxpẽr o:

—Nà tanhmã kot paj we amnhĩ to nẽ Jejus kõt amnhĩ nhĩpẽx mex rãhã o ri ixpa? Ja kaxyw ixãhpumunh tÿxre hã. Anẽ.

Hãmri nẽ ã ajamaxpẽr anhÿr o apaja apẽ hihtÿx japẽr. Hã koja Tirtũm hprĩ hã tanhmã amã ja kukamã harẽnh to nẽ kaxyw ato axihtÿx ka ixpyrà nẽ hkõt pix mã ri amnhĩ nhĩpẽx o apa. 16Jakamã kêr pu mẽ ãm Tirtũm kãm hprãm xà hkõt pix mã tanhmã kãm amnhĩ nhĩpẽx to ho papa. Ra mẽ pahte hkõt amnhĩ nhĩpẽx o papa xàja kõt pix mã arĩ amnhĩ nhĩpẽx rãhã ho papa.

17E Kris kõt ixtõ nẽ ixtõxjaja. Na pa ra mẽ anoo mã Jejus kõt tãm ri amnhĩ nhĩpẽx o ri ixpa. Tã kêr ka mẽ ja hã ixpumu nẽ ixpyrà nẽ hkõt amnhĩ nhĩpẽx o ri apa. Hãmri nẽ nhÿri mẽ kot ixpyrà nẽ ã amnhĩ nhĩpẽx anhÿr xwÿnhjẽ hõ pumu nẽ uràk nẽ ã amnhĩ nhĩpẽx anẽ. 18-19Jesús kot mẽ pamã mẽ pahte amnhĩ tomnuj mÿrapê pĩ kahpa hã mẽ panê htykja nhũm mẽ ra ohtõ nẽ hprĩ hã mar tã hkõt amnhĩ xunhwÿr kêt nẽ. Mẽ kãm ã kot amnhĩ nhĩpẽx anhÿrja ã mar prãm nõkati. Jakamã te mẽ kãm Jejus kurê xwÿnh pyrãk. Na htem hã hpijaam kêt kãm tanhmã ri amnhĩ tomnuj to ho pa. Nẽ kãm amnhĩ mex pix prãm. Nẽ tanhmã amnhĩ tomnuj to nẽ ja hã amnhĩ pumu nẽ hkĩnh nẽ. Nom tee ri ja hã amnhĩ pumu nẽ hkaprĩ nẽ ri pa hkõt nẽ. Tã ã mẽ kot amnhĩ nhĩpẽx anhÿr jakamã koja mẽ nhÿrmã ma mẽ kot amnhĩ xà htÿx kamã hamak o pa tũm xàta wÿr hapẽx. Nà koja mẽ ã amnhĩ nhĩpẽx anẽ. Ra ixte mẽ amã ja hã mẽ harẽnh rax tã pa axte mẽ amã mẽ harẽ. Inhmã mẽ hkaprĩ hkõt na pa hte xatã mẽ amã ja hã mẽ harẽ. 20Kêt mẽ papajaja mẽ kurom mẽ pahpẽ kaxkwa nhõ xwÿnh nom kormã. Koja nhÿrmã Jejus Kris akupÿn mẽ pahwÿr kaxkwa rũm wrÿ. Mẽ papytãr xwÿnh maati Pahihtija akupÿn wrÿ hãmri nẽ ma akupÿm amnhĩ kõt mẽ pahto api. Jakamã na pu htem arĩ pahkĩnh pẽ amnhĩ wÿr kamã pajamak rãhã ho ri papa. 21Na pu htem jar pyka ja kamã Jejus kĩnhã paxirerek nẽ pahpunuj nẽ ri papa. Nom koja nhÿrmã akupÿn mẽ pahwÿr wrÿ hãmri nẽ amnhĩ pyrã nẽ mẽ pamã mẽ panhĩ nyw gõ pu mẽ uràk nẽ paxihtÿx kãm pahtÿr tũm nẽ papa ho papa. ã kot mẽ panhĩpẽx anhÿr kaxyw àhpumunh o àhpumunh. Tã koja àhpumunh tÿx kãm mẽmoj piitã ho amnhĩptãr pa. Pu mẽ pahpiitã hkõt amnhĩ nhĩpẽx mex rãhã ho ri papa.

Pawre kot mēmoj tā mẽ kām karō

Epes 4.3; Piripos 2.2; Korosē 3.15

4 ¹E Kris kōt ixtō nē ixtōxjaja. Inhmã mẽ ajapêê. Na pa hte mẽ ato ijamak o ixkrĩ nē mẽ amã ijamaxpēr nē ixkĩnh nē. Nē jar mẽ pahkwỳjê mã mẽ ajarēnh o ri ixkrĩ. E kwa kêr ka mẽ arĩ Pahihti kapēr kōt pix mã mãn amnhĩ nhĩpêx mex rãhã ho ri apa.

²Nē wa ka Ewox mẽ Sĩxika wa. Na ka xep hte wa mẽmoj tā axpēn kamã agryk rãhã ho ri apa. Kwa wa ã amnhĩ nhĩpêx anhỹrja mã anhũre nē tãm axpēn nhĩpêx. Pahihti Kris kōt war ate axpēn to war atōx kēnã kot ka kêt wa axtem nē mẽmoj tā axpēn kamã agryk o ri apa.

³Nē ka Xikitre. Apê ixkrãmnhwỳ mex jakamã kêr ka axpēn tā wa nita wa kãm akapēr kãm axihtỳx nē kê war ama nē akupỳm tãm axpēn nhĩpêx. Na pre wa ra Kremēn mẽ hkwyjê mẽ hpimràãtã ixpyrà nē Jejus kot tanhmã mẽ panê amnhĩ nhĩpêx to hã harēnh o ri pa. Tĩrtũm nhõ kagà kamã mẽ hixi piitã hikwỹ. Mẽ pahťĩr tũm nē mẽ papa mã xwỳnhjaja ra Tĩrtũm nhõ kagà kamã mẽ panhĩxi jaxwỳr par.

⁴Nē kêr ka mẽ apê Pahihti hkwy hã akĩnh nē ri apa. Mẽ ate ã amnhĩ nhĩpêx anhỹr o apaja na pa inhmã hprãm tỳx jakamã kot paj axte mẽ amã harē. Kwa kêr ka mẽ akĩnh nē ri axpēn kōt apa.

⁵Pahihti Jejus ra akupỳn mẽ pahwỳr nojarêt jakamã kêr ka mẽ kutêp mẽ piitã ri mẽ ho mex o ri mẽ hkōt apa.

⁶Nē kêr ka mẽ tee ri amnhĩ kukamã ajamaxpēr o ri apa hkê nē. Arĩ amnhĩ to Tĩrtũm wỳr rãhã nē. Kot ka mẽ mẽmo arĩgro hã apê amrakati japēr nē tee ri ja hã amnhĩ pumu nē amnhĩ to awỳ kê mẽ ama nē mẽ amã mẽmoj gō. Rỳ mẽ ate mẽmoj tā hwỳr xwỳnhnta tanhmã mẽ amã hipêx to ka mẽ amnhĩ tã omu nē kãm:

— Nà ãm hãmri na ka ã inhĩpêx anē nē inhmã ja gō Tĩrtũm. Amex o amex.

Anhỹr o kãm amnhĩ jarē. ⁷Kot kaj mẽ ã amnhĩ to hwỳr anhỹr o ri apa nhũm tanhmã mẽ akrã hto ka mẽ mẽ apê Jejus Kris kwỳ hã ajamakêtkati nē axãmnhĩx ri apa. Hãmri nē mẽmoj tã tee ri amnhĩ kukamã ajamaxpēr o ri akaprĩ nē apa hkê nē. ãm akĩnh rãhã ri apa. Tĩrtũm kot tanhmã mẽ pahťo nhũm mẽ pajamakêtkati nē ri mẽ papaja mẽ pahte amnhĩ tã omunh kêt. ãm tapxipix kot ã mẽ panhĩpêx anhỹr kukamã àhpumunh tỳx.

⁸E Kris kōt ixtō nē ixtōxjaja. Nà ixkapēr ã kagà jatur xà na ja. Kwa kêr ka mẽ ixujarēnh mar tỳx nē hkōt amnhĩ nhĩpêx o apa.

Nē kêr ka mẽ axapēnh mex pix kukamã ri ajamaxpēr o apa.

Nē mẽmoj mex pix kukamã ri ajamaxpēr.

Nē axpēn mã akapēr mex pix kukamã ri ajamaxpēr.

Nē akatàt kôt akapēr xàptàr pix o axpën mã akapēr hkukamã ri
ajamaxpēr o ri apa.

Nē tãm ri amnhĩ nhĩpêx hkukamã mãn ajamaxpēr o ri apa.

Nē mẽ piitã ri mẽ ho mex o apa hkukamã ajamaxpēr.

Nē mẽ akapēr mex pix kukamã mãn ajamaxpēr o ri apa.

E kêr ka mẽ ã amnhĩ nhĩpêx anhÿrja kukamã ajamaxpēr rãhã ho ri apa.

9Nē mẽ akôt ixpare ri na pa pre Kris kôt amnhĩ to mex pix nē tãm
ixkapēr o ri ixpa. Tã kêr ka mẽ ixpyrà nē ã amnhĩ nhĩpêx anê. Koja
Tĩrtũm ja hã mẽ apumu nē mẽ akôt ri pa ho pa. Kêp mẽ pamã mẽ
paxãmnhĩx pajamakêtkati xà nhõr xwÿn na.

Mẽ kot Pawre hwÿr mẽmoj mẽnh nhũm kot omunh nē hkĩnh ã harênh

Sikũn Korĩt 11.7-9; Piripos 1.5

10Nē amnepêm na ka prem xatã tanhmã ixto mex to ho ri apa. Tã
axte ã inhĩpêx anhÿr prãm nom mẽ apê awry nē ixpa jakamã ka xep
prem tee ri tanhmã ixto mex to hkukamã ajamaxpēr kaprÿ. Tã jar mẽ
kot ijaxàr ã ijarênh ma nē ixwÿr Eparoxit mẽ nhũm man ixwÿr mõ nē
inhmã kàxporeta gõ. Mẽ amã ijapê hã ixwÿr amê pa omu nē ixkĩnh tÿx
nê. Nē ixkĩnh kãm Tĩrtũm mã mẽ ajarê. ãm hãmri na ka prem ixwÿr
amê.

11-12Nē na pa hte tanhmã ixkute htã arĩ ixkĩnh nē ijamakêtkati nē ri
ixpa. Jakamã kot pa mẽmo arĩgro hã ixpê amrakati nē inhmã prãm japêr
tã no ãm tee ri amnhĩ kukamã ijamaxpēr o ri ixkaprĩ hkêt nê. Arĩ ixkĩnh
rãhã ixãmnhĩx ri ixpa. Rÿ pa inhõ mẽmoj rax japêr nē mããnên ixkĩnh
nê ixãmnhĩx ri ixpa. Na pa pre tõiã inhõ rax nê ixpa. Nê tõiã inhõ hkêt
nê ixpa. Tã arĩ ixkĩnh rãhã nê ixpa ho ixpa. 13Na hte Kris mẽmoj piitã
hkukamã ixto ixihtÿx pa ÿ hã mẽmoj kutã ixihtÿx nê ixpa. Jao mẽmo
arĩgro hã inhmã prãm tÿx nê ri ixpa htã ÿ hã kutã ixihtÿx nê ixãmnhĩx
ri ixpa. 14Tã jar ixpunuj nê ixkrĩ ka mẽ ijarênh ma nê ixwÿr kàxpore
hkwÿ rê. ãm hãmri na ka prem ixwÿr arê. 15Amnepêm na pa pre mẽ
anhõ pika pê Masetõn rũm ixkato nê mẽ piitã mẽ kãm Jejus kot tanhmã
mẽ panê amnhĩ nhĩpêx to hã harênh o ri ixpa ka mẽ xatã ixwÿr kàxpore
hkwÿ rê pa ho amnhĩm ixujaprõr o ri mẽ hkôt ixpa. Mẽ apê Piripos kamã
Kris kôt ixtõ nê ixtõx pixjaja na ka prem ã inhĩpêx anê. Krĩ hkwÿ kamã
Kris kôt mẽ pahkwÿjaja na mẽ akĩnhã ã inhĩpêx anhÿr kêt nê. ãm mẽ
kapxipix na ka pre ã ixto mex anê. 16Tesarõn kamã ixpare ri na pa pre
ixpê amrakati kumrêx nê ri mẽ hkôt ixpa ka mẽ xatã ixwÿr kàxpore
hkwÿ rê pa pre ho amnhĩm ixujaprõr rãhã ho ri mẽ hkôt ixpa. 17Nom
mẽ ate ixwÿr hkwÿ rênh kaxyw mẽ akamã ijamak o ri ixpa hkêt nê. Rÿ
ijamaxpēr o:

—Ko. Koja Piripos nhõ xwÿnhjaja ijarênh ma nê kãm ixkaprĩ nê
ixwÿr kàxpore hkwÿ rênh japêr.



Piripos 4.10-18

Anhÿr o mẽ akukamã ijamaxpêr kêt nê. Nom ra mẽ ate ixwÿr hkwy rênh jakamã koja Tirtûm ja hã mẽ apumu nê mẽ ato mex nê. ã mẽ pahte axpên kutã panojarêt anhÿrja na kãm hprãm.

18Tã nhûm Eparoxitja ham mẽ arûm kato nê man ixwÿr mō nê inhmã kàxporeta gō. Kwa na ka mẽ inhmã òr rax nê. Koja tokyx ixpê hapêx kêt pa kritpêm ho ixàpkur o ixkrĩ. Tã ot pa ho kōta nê tanhmã hkre kamã kute pumunh xà hkôt hã kagà nê mẽ awÿr kumê. Nà mẽ ate ixwÿr axàmnhōrta na Tirtûm omu nê ixtã mẽ apumu nhûm ja kãm mex kumrêx. Te mẽ kot mẽ hkuxwaxà hpâr nhûm mẽ kãm mexta pyræk nhûm ja kãm mex nê. 19Nà koja Tirtûm mẽ apê Jejus Kris kwÿ hã mẽ amã mẽ ate mẽmoj to presija xà nhōr rãhã ho pa. Mẽmoj piitã kêp ò kênã.

20E kêr pu mẽ Mẽpanhĩpêêxà maati Tirtûm mã mẽ mex o mẽ harênh rãhã o papa. Ja na inhmã hprãm.

21-22Nê ot pa mẽ jar ixpiitã mẽ apê Jejus Kris kôt mẽ ixkwÿjê hwÿr kagàja kamã mẽ ixpêr mẽ. Mẽ ixpyrà nê mẽ apê Tirtûm kra hã. Pa nê Kris kôt mẽ pahťō nê mẽ pahťōxjaja. Nê Rōm nhō pahi mã mẽ àpênh xwÿnh kot Kris kôt amnhĩ xunhwÿr xwÿnhjaja mãânên. ãm jar mẽ ixpê Tirtûm krajê piitã pa mẽ awÿr ixpêr mẽ.

23E kê Pahihti Jejus Kris mẽmoj to mẽ akutã nojarêt rãhã nê. Jao mẽ ato mex o pa.

Tã ãm ja pix. Ixpê Pawre na pa mẽ awÿr kagàja nhĩpêx nê kumê.